

## **Malaysia salur bantuan kemanusiaan RM1 juta kepada Lubnan**

**Astro Awani**

**08 Ogos 2020**

**Fauzi Suhaimi,**

KUALA LUMPUR: Kerajaan Malaysia menyalurkan sebanyak RM1 juta bantuan kemanusiaan menerusi Pertubuhan Palang Merah Lubnan (LRC) atas semangat persaudaraan kepada Lubnan.

Perdana Menteri, Tan Sri Muhyiddin Yassin berkata, Malaysia yakin dan percaya rakyat di negara itu mampu mengatasi impak tragedi dan meneruskan kehidupan dengan kekuatan semangat dan perpaduan berterusan.

"Kerajaan dan rakyat Malaysia berdiri teguh bersama rakyat Lubnan dalam tragedi letupan di Pelabuhan Beirut yang menyebabkan kemusnahan besar.

"Sehubungan itu, kami berkongsi kesedihan dan penderitaan dengan saudara kami di sana selain menzahirkan rasa simpati serta mengucapkan takziah kepada keluarga mangsa atas kehilangan orang tersayang," katanya dalam kenyataan di sini pada Sabtu.

Dalam pada itu, Muhyiddin turut mendoakan kesejahteraan rakyat di negara itu khususnya mereka yang terjejas.

"Kepada yang cedera, kami juga mendoakan agar mereka cepat sembuh," ujarnya.

Dalam kejadian pada Selasa lalu, sekurang-kurangnya 150 orang maut dan lebih 5,000 cedera dalam letupan di Pelabuhan Beirut yang disyaki berpunca daripada bahan ammonia nitrat disimpan di gudang pelabuhan itu sejak 2013.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/malaysia-salur-bantuan-kemanusiaan-rm1-juta-kepada-lubnan-254393>